

摘藻堂四庫全書薈要

集部

欽定四庫全書薈要卷一萬九千八百二十七

集部

唐文粹卷十四上

宋姚鉉編

詩戊

總六十四首

古調歌篇一

古風

古風十一首

李白

古意三首

王績

覽古十四首

道士吳筠

古意二首

賀蘭進明

古意九首

釋貫休

詠古

李涉

感古三首

盧仝

古意

賈島

擬古

釋皎然

古興

呂溫

諷古二首

劉禹錫

續古詩十首

白居易

古意贈補闕

孟郊

古意二首

祖詠

古意

陸龜蒙

古意

李白

古興

權德輿

古風十一首

李白

大雅久不作
吾衰竟誰陳
王風委蔓草
戰國多荆榛
龍

虎相啖食兵戈逮狂秦正聲何微茫哀怨起騷人揚馬
激頽波開流蕩無垠廢興雖萬變憲章亦已淪自從建
安來綺麗不足珍聖代復元古垂衣貴清真羣才屬休
明垂運共躍鱗文質相炳煥衆星羅秋旻我志在刪述
垂輝映千春希聖如有立絕筆於獲麟

咸陽二三月宮柳黃金枝綠幘誰家子賣珠輕薄兒日
暮醉酒歸白馬驕且馳意氣人所仰冶游方及時子雲
不曉事晚獻長楊辭賦達身已老草玄鬢若絲投閣良

可歎但為此輩嗤

莊周夢胡蝶胡蝶為莊周一體更變易萬事良悠悠乃
知蓬萊水復作清淺流青門種瓜人舊日東陵侯富貴
故如此營營何所求

齊有個儻生魯連特高妙明月出海底一夕開光耀却
秦振英聲後世仰末照意輕千金贈顧向平原笑吾亦
澹蕩人拂衣可同調

黃河走東溟白日落西海逝川與流光飄忽不相待春

容捨我去秋髮已衰改人生非寒松年貌豈長在吾當
垂雲螭吸景駐光彩

邊關饒風沙蕭索竟終古木落秋草黃登高望塞虜荒
城空大漠邊邑無遺堵白骨橫千霜嵯峨蔽榛莽借問
誰凌虐天驕毒威武赫怒我聖皇勞師事鼙鼓陽和變
殺氣發卒騷中土三十六萬人哀哀淚如雨且悲就行
役安得營農圃不見征戍兒豈知關山苦李牧今不存
邊人飼豺虎

燕昭延郭隗遂築黃金臺劇辛方趙至鄒衍復齊來
奈何青雲士棄我如塵埃珠玉買歌笑糟糠養賢才方知
黃鵠舉千里獨徘徊

天津三月時千門桃與李朝為斷腸花暮逐東流水前
水復後水古今相續流新人非舊人年年橋上游雞鳴
海色動謁帝羅公侯月落西上陽餘輝半城樓衣冠照
雲日朝下散皇州鞍馬如飛龍黃金絡馬頭行人皆辟
易志氣橫嵩丘入門上高堂列鼎錯珍羞香風引趙舞

清管隨齊謳七十紫鴛鴦雙雙戲庭幽行樂爭晝夜自
言度千秋功成身不退自古多愆尤黃犬空歎息綠珠
成釁讎何如鷗夷子散髮掉扁舟

郢客吟白雪遺響飛青天徒勞歌此曲舉世誰為傳試
為巴人唱和者乃數千吞聲何足道歎息空悽然

燕趙有秀色綺樓青雲端眉目豔皎月一笑傾城歡常
恐碧草晚坐泣秋風寒纖手怨玉琴清晨起長歎焉得
偶君子共成雙飛鸞

美人出南國灼灼芙蓉姿皓齒終不發芳心空自持由
來紫宮女共妬青蛾眉歸去瀟湘沚沈吟何足悲

古意三首

王績

幽人在何所紫巖有仙躅月夜橫寶琴此外將安欲材
拙嶧山榦微點崑丘玉漆抱蛟龍脣絲纏鳳凰足前彈
廣陵罷後以明光續百金買一聲千金傳一曲世無鍾
子期誰知心所屬

桂樹何蒼蒼秋來花更芳自言歲寒性不知露與霜幽

人重其德徒植臨前堂連拳八九樹偃蹇二三行枝枝
自相糾葉葉還相當去來雙鴻鵠栖息兩鴛鴦榮蔭誠
不厚斤斧亦勿傷赤心許君時此意那可忘

彩鳳欲將歸提羅出郊訪羅張大澤已鳳入重雲颺朝
栖崑閬木夕飲蓬壺漲問鳳那遠飛賢君坐相望鳳言
何深德微禽安足尚但使雛卵全無令矰繳放皇臣力
牧舉帝樂簫韶暢自有來巢時明年阿閣上

覽古十四首

道士吳筠

聖人重周濟明道欲救時孔席不暇暖墨突何嘗緇興
言振頽綱將以有所維君臣恣淫惑風俗日凋衰三代
業遽隕七雄遂交馳庶物墜塗炭區中若焚絲秦皇燎
儒術方冊靡孑遺大漢歷五葉斯文復崇推乃驗經籍
道與世同屯夷弛張固天意設教安能持

興亡道之運否泰理所全奈何淳古風既往不復旋三
皇已散朴五帝初尚賢王業與霸功浮偽日以宣忠誠
及狙詐殽混安可甄餘智入九霄守愚淪重泉永懷巢

居時感涕徒泣然

棟宇代巢穴其来自三皇跡生固為累經始增百王瑤
臺既滅夏瓊室復隕湯覆車世不悟秦氏興阿房繼
踵迷反正漢家崇建章力役弊萬人瓌竒殫八方徇志
仍未極促齡已云亡侈靡竟何在荆榛生廟堂

閒居覽前載惻彼商與秦所殘必忠良所寶必凶器昵
諛方自聖不悟禍滅身箕子作周輔孫通為漢臣洪範
及禮儀後王用經綸

吾觀采苓什復感青蠅詩讒佞亂忠孝古今同所悲奸
邪起譖猾骨肉相殘夷漢儲殞江充晉嗣滅驪姬天性
猶可間君臣固其宜子胥烹吳鼎文種斷越鉞屈原沈
湘流厥感咸自貽何不若范蠡扁舟無還期

嘗稽真仙道清寂祛衆煩秦皇及漢武焉得游其藩情
擾萬機屑位驕四海尊既欲先宇宙仍規後乾坤崇高
與久遠物莫能兩存矧乃恣所慾荒淫伐靈根金膏特
延期玉色復動魂征戰窮外域殺傷被中原天鑒諒難

誣神理不可諉安期返蓬萊王母還崑崙異術終莫告
悲哉竟何言

魯侯祈正術尼父從棄捐漢主思英才賈生被排遷始
皇重韓子及覩乃不全武帝愛相如既徵復忘賢貴遠
世咸爾賤今理共然方知古來主難以効當年

食其昔未偶落魄為狂生一朝君臣契雄辯何縱橫運
籌康漢業憑軾下齊城既以智所達還為智所烹豈若
終賤貧酣歌本無營

晁錯抱遠策為君納良規
削彼諸侯權永用得所宜
姦臣負舊隙乘釁謀相危
世主竟不辨身戮宗且夷
漢景稱欽明濫罰猶如斯
比干與龍逢殘害何足悲

絳侯成大績賞厚位仍尊
一朝對獄吏榮辱安可論
蘇生佩六印奕奕為殃源
主父食五鼎昭昭成禍根
李斯佐二辟巨釁鍾其門
霍孟翼三后伊戚及後昆
天人忌盈滿茲理固永存
方知得意者何必乘朱輪
滅景栖遠壑弦歌對清罇
二疏返濱海蔣詡歸林園
蕭灑去物累

此謀誠足敦

至人順通塞委命固無疵吾觀太史公可謂識道規留
滯焉足憤感懷殄生涯吾歎龔夫子秉義確不移晦跡
一何晚天年天當時黨膏自銷鑠楚老空餘悲

達者貴量力至人尚知幾京房洞幽贊神奧咸發揮如
何嫉元惡不悟禍所歸謀物闇謀已誰言爾精微

玄元明知止大雅尚保躬茂先洽聞者幽蹟咸該通弱
年賦鷦鷯可謂達養蒙晚節希鸞鵠長飛戾曾穹知進

不知退遂令其道窮伊昔辨福初胡為迷禍終方驗嘉
遁客永貞天壤同

聖人垂大訓奧義不苟設天道殃頑兇神明祐懿哲斯
言猶影響安得復迴穴絲睞誕英睿唐虞育昏孽盜跖
何延期顏生乃短折魯隱全克讓禍機遂潛結楚穆肆
巨逆福柄奚赫烈田常弑其主祚國久罔缺管仲存霸
功世祖成詭說漢氏方板蕩羣閹恣邪譎蹇蹇陳蕃徒
孜孜抗忠節誓期區宇靜爰使兇醜絕謀協事靡從俄

而反誅滅古來若茲類紛擾難盡列道遐理微茫誰為
我昭晰吾將詢上帝寥廓詎躋徹已矣勿用言忘懷庶
自悅

古意二首

賀蘭進明

秦庭初指鹿羣盜滿山東忤意皆誅死所言誰肯忠武
關猶未啓兵入望夷宮為崇非涇水人君道自窮
崇蘭生澗底香氣滿幽林采采欲為贈何人是同心日
暮徒盈把徘徊憂思深慨然紉雜佩重奏丘中琴

古意九首

釋貫休

一雨火雲盡閉門心冥冥蘭花與芙蓉滿院同芳馨佳
人天一涯好鳥鳴嚶嚶我有雙白壁不羨於虞卿我有
徑寸珠別是天地精玩之室生白蕭灑身安輕只應天
上人見我雙眼明

陽烏爍萬物草木懷春思茫茫塵土飛培擁名利根我
本事簞笠幼知天子尊學為毛氏詩亦多直致言不慕
需臠類附勢同崩奔唯尋桃李蹊去去長者門

美人如游龍被服金鷲鴛手把古刀尺在彼白玉堂文
章深掣曳珂珮鳴玎璫好風吹桃花片片落銀床何妨
舉羽翰遠逐朱鳥翔

乾坤有清氣散入詩人脾聖賢遺清風不在惡木枝千
人萬人中一人兩人知憶在東溪日花開葉落時幾擬
以黃金鑄作鍾子期

莫輕白雲白不與風雨會莫見守羊兒謂是初平輩人
生非日月光輝豈長在一榮與一辱今古常相對君不

見于公門子孫好冠蓋

古交如真金百鍊色不回
今交如暴流倏忽生塵埃
我願君子氣散為青松
栽我恐荆棘花只為小人開
傷心復傷心吟上高高臺

常思謝康樂文章有神力
是何清風清凜然似相識
一種為頑嚚得作翻經石
一種為枯槁得作登山屐
永嘉為郡後山水添鮮碧
何當舉羽翰一去觀遺迹

常思李太白仙筆驅造化
玄宗致之七寶牀
虎殿龍樓

無不可一朝力士脫靴後玉上青蠅生一箇紫皇案前
五色麟忽然掣斷黃金鎖五湖大浪如銀山滿船載酒
槌鼓過賀老成異物顛狂誰敢和寧知江邊墳不是猶
醉卧

憶在山中時丹桂花歲蕤紅泉浸瑶草日夕生華滋箬
屋開地爐翠牆挂藤衣看經竹牕邊白猿三四枝東
峯有老人眼碧頭骨竒種薤煮白石旨趣如嬰兒月上
來打門月落方始歸授我微妙訣恬淡無所為別來六

七年只恐白日飛

詠古

李涉

大智思濟物道行心始休
垂綸自消息歲月任春秋
紂虐武既賢風雲固可求
順天行殺機所向協良謀
況以丈人師將濟安川流
何勞問枯骨再取陰陽籌
霸國不務人兵戈恣相酬
空令渭水跡千古獨悠悠

感古三首

盧仝

天生聖明君必資忠賢
臣舜禹竭股肱共佐堯
為君四

載成地理七政齊天文階下
蕓莢生琴上南風薰輪轉
夏殷周時復猶一人秦漢事
讒巧魏晉忘機釣猜忌相
翦滅邇來迷恩親以愚保其
身不覺身沈淪以智理其
國遂為國之賊苟圖容一身
萬事良可惻可憐萬乘君
聰明受沈惑忠良伏草莽無
因施羽翼日月異又蝕天
地晦如墨既亢而後求異哉
龍之德

人生何所貴所貴有終始昨
日盈尺璧今日盡瑕棄蒼
蠅點垂棘巧舌成錦綺箕子
為之奴比干諫而死仲尼

魯司寇出走為羣婢假如屈原醒其奈一國醉一國醉
呶號一人行清高便欲激頽波此事真徒勞上山逢猛
虎入海遭巨鼈王者苟不死腰下魚鱗刀東海波連天
三度成桑田高岸高於屋斯須變溪谷天地猶尚然人
情難久全夜半白刃讎旦來金石堅蕭綬既解拆陳印
亦棄捐竭節遇刀割輸忠遭禍纏不予衾之眠信予衾
之穿明鏡不自照膏潤徒自煎抱劍長太息淚墮秋風
前

古來不患寡所患患不均單醪投長河三軍盡沈淪今
人異古人結託唯親賓毀拆唯鵲巢不行鴟鳩仁鄙悋
不識分有心占陽春鸞鶴日已踈燕雀日已親小物無
大志安測栖松筠恩眷多棄故物情尚逐新瓦礫暫拂
拭光掩連城珍屑吻恣談鑠黃金成灰塵蘇秦北游趙
張祿西入秦既變嫂叔節仍擯華陽君萬世金石交一
餉如浮雲骨肉且不顧何況長羈貧

古意

賈島

碌碌復碌碌百年雙轉轂志士中夜心良馬白日足俱
為不等閒誰是知音目眼中兩行淚曾弔三獻玉

擬古

天寶十
四載

釋皎然

日出天地正煌煌闢晨曦六龍驅羣動古今無盡時夸
父亦何愚競走先自疲飲乾咸池水折盡長桑枝渴死
化燭火嗟嗟徒爾為空留鄧林在摧折令人嗤

古興

呂溫

越歐百鍊時楚卞三泣地二寶無人識千齡皆棄置空

巖起白虹古獄生紫氣安得命世客直來開奧祕劒任
刺鐘看玉從投火試必能絕疑惑然後論奇異

諷古二首

劉禹錫

軒后初冠冕前旒為蔽明安知從複道然後見人情
簿領乃俗士清談信古風吾觀蘇令綽朱墨一何工

續古詩十首

白居易

戚戚復戚戚送君遠行役行役非中原海外黃沙磧伶
俜獨居妾迢遞長征客君望功名歸妾憂生死隔誰家

無夫婦何人不離拆所恨薄命身嫁遲別日迫妾身有
存沒妾心無改易生為閨中婦死作山頭石

掩涕別鄉里飄飄將遠行茫茫綠野中春盡孤客情驅
馬上丘壠高低路不平風吹棠梨花啼鳥時一聲古墓
何代人不知姓與名化作路傍土年年春草生感彼忽
自悟今我何營營

朝采山上薇暮采山上薇歲晏薇亦盡饑來何所為坐
飲白石水手把青松枝擊節獨長歌其聲清且悲樵

馬非不肥所苦長繫維豢豕非不飽所憂竟為犧行行
歌此曲以慰常苦飢

雨露長纖草山苗高入雲風雪折勁木澗松摧為新風
摧此何意雨長彼何因百丈澗底死寸莖山上春可憐
苦節士感此涕盈巾

窈窕雙鬟女容德俱如玉晝居不踰閭夜行常秉燭氣
如含露蘭心如貫霜竹宜當備嬪御胡為守幽獨無媒
不得選年忽過三六歲暮望漢宮誰在黃金屋邯鄲進

倡女能唱黃花曲一曲稱君心恩榮連九族

栖栖遠方士讀書三十年業成無知己徒步來入關長
安多王侯英俊競攀援幸隨衆賓末得廁門館間東
閣有旨酒中堂有管絃何為向隅客對此不開顏富貴
無是非主人終日歡貧賤多悔尤客子中夜歎歸去復
歸去故鄉貧亦安

涼風飄嘉樹日夜減芳華下有感秋婦攀條苦悲嗟我
本幽閒女結髮事豪家豪家多婢僕門內頗驕奢良

人近封侯出入鳴玉珂自從富貴來恩薄讒言多家婦
獨守禮羣妾互竒袤但信言有玷不察心無瑕容光未
銷歇歡愛忽蹉跎何意掌上玉化為眼中沙盈盈一尺
水浩浩千丈河勿言小大異隨分有風波閨房猶復爾
邦國當如何

心亦無所迫身亦無所拘何為腸中氣鬱鬱不得舒不
舒良有以同心久離居五年不見面三年不附書念此
令人老抱膝坐長吁豈無盈樽酒非君誰與娛

攬衣出門行游觀遠林渠澹澹春水暖東風生綠蒲上
有和鳴鴈下有掉尾魚飛沈一何樂鱗羽各有徒而我
方獨處不與之子俱顧彼自傷已禽魚之不如出游欲
遣憂孰知憂有餘

春旦日初出曈曈耀晨輝草木照未遠浮雲已蔽之天
地黯以晦當午如昏時雖有東南風力微不能吹中園
何所有滿地青青葵陽光委雲上傾心欲何依

古意贈補闕

孟郊

曲木忌日影讒人畏賢明自然照燭間不受邪佞輕不
有百鍊火孰知寸金精金鉛正同爐願分精與麤

古意二首

祖詠

楚王意何去獨自留巫山偏使世人見迢迢江水間駐
舟春潭裏誓願拜靈顏夢寐覩神女金沙鳴珮環間
豔絕世姿令人氣力微含笑默不語化作朝雲飛

夫差日淫放舉國求妃嬪自謂得王寵代間無美人碧
羅蒙天閣坐輦乘芳春宮女數千騎常游江上濱年深

玉顏老時薄花粧新拭淚下金殿嬌多不顧身生前妬
歌舞死後同灰塵冢墓令人哀哀於銅雀臺

古意

陸龜蒙

君心莫淡薄妾意正栖託願得雙車輪一夜生四角

古意

李白

白酒初熟山中歸黃鸝啄黍秋正肥呼兒烹雞酌白酒
男女歡笑牽人衣高歌取醉欲自慰起舞落日爭光輝
游說萬乘苦不早著鞭跨馬涉遠道會稽愚婦輕買臣

余亦辭家方入秦仰天大笑出門去我輩豈是蓬蒿人

古興

權德輿

月中有桂樹無翼難上天海底有驪珠下隔萬丈淵人
生大限雖百歲就中三十稱一世晦明烏兔相推遷雪
霜漸到雙鬢邊紀憂戚戚多浩歎不得如意居太半一
氣暫聚常恐散黃河清兮白石爛

唐文粹卷十四上

欽定四庫全書薈要卷一萬九千八百二十八集部

唐文粹卷十四下

宋姚鉉編

詩已

總五十六首

古調歌篇二

雜興四十七

雜興

聶夷中

雜言

謝陶

雜詩三首

權德輿

雜詩六首 李華

雜詩二首 張說

雜詩二首 儲光義

雜感 鮑防

雜言 司空圖

雜詩 獨孤及

雜諷九首 陸龜蒙

感興 崔膺

遣興三首杜甫

寓言二首賈至

寓興賈島

寓興歐陽詹

不欺賈島

辯士

新昌里姚合

口號賈島



絕句

悲歌三首
顧況

美人
陸龜蒙

客思
楊敬之

感事
陸龜蒙

寓言
孟郊

傷感九

汾陰行
李嶠

八月五日歌 顧況

三鄉驛伏觀玄宗望女几山詩小臣斐然有

感 劉禹錫

江南遇天寶樂叟 白居易

連昌宮詞 元稹

感興 李涉

玉華宮 杜甫

至開化里壽春公故宅 韋應物

杜秋娘詩

杜牧

雜興

聶夷中

兩葉能蔽目雙豆能塞聰理身不知道將為天地聳擾
擾造化內茫茫天地中苟或有所願毛髮亦不容

雜言

謝陶

天不與人言禍福能自至水火雖活人暫不得即死蹈
之焚斯湏憑之溺容易水火與禍福豈有先言耳

雜詩三首

權德輿

婉彼羸氏女吹簫偶簫史彩鸞駕飛煙綽約兩仙子神
期諒交感相顧乃如此豈比成都人琴心中夜起
陽臺巫山上風雨忽清曠朝雲與游龍變化千萬狀魂
交復目斷縹緲難比況蘭澤不可親凝情坐惆悵
淇水春正淥上宮蘭葉齊光風兩搖蕩鳴佩出中閨一
顧授橫波千金呈瓠犀徒然路傍子怳怳復悽悽

雜詩六首

李華

黃鐘叩元音律呂更循環邪氣悖正聲鄭衛生其間典

樂忽消微波浪與天渾嘈嘈鳴泉動好鳥徒懸蠻王吉
歸鄉里甘心長閉關

玄黃與丹青五氣之正色聖人端其源上下皆有則齊
侯好紫衣魏帝婦人飾女奴厭金翠傾海未滿臆何忍
巖子陵羊裘死荆棘

甘酸不私人元和運五行生人受其用味正心亦平爪
牙相踐傷日與性命爭聖人不能絕鑽燧與炮烹嗜慾
乘此熾百金資一傾正消神耗衰邪勝體充盈顏子有

餘樂瓢中寒水清

陰魄淪宇宙太陽假其明臣道不敢專由此見虧盈未
聞東菑稼一氣嘉穀成上天降寒暑地利乃可生葛藟
附柔木繁陰蔽曾原風霜摧枝條不復底本根女蘿依
松栢然後得長存

孔光尊董賢胡廣慚李固儒風冠天下而乃敗王度
絳侯與博陸忠朴受遺顧求名不考實文弊反為蠹

結交得書生書生鈍且直爭權復爭利終不得其力我

逢縱橫者是我牙與翼相旋如疾風並命趨紫極奔車
得停軌風火何用逼仁義豈有常肝膽反為賊勿嫌書
生直鈍直深可憶

雜詩二首

張說

抱薰心恒焦舉旆心恒搖天長地自久歡樂能幾朝君
看西陵樹歌舞為誰嬌

問子青霞意何事留朱軒自言心遠俗未始迹辭喧
過蒙良時幸側息吏途煩簪纓非宿好文史棄前言夕

卧北牕下夢歸南山園白雲慚幽谷清風媿泉源十年
茲賞廢佳期今復存挂冠謝朝侶星駕別君門

雜詩二首

儲光義

秋風肅天地太行高崔嵬猿狖清夜吟其聲一何哀寂
寥掩圭華夢寐游蓬萊琪樹遠亭亭玉堂雲中開洪
崖吹簫管素女飄飄來雨師既先後道路無纖埃鄙哉
楚襄王獨好雲陽臺

渾胚本無象末路多是非達士志寥廓所在能忘機耕

鑿時未至還山聊採薇虎豹對我蹲鸞鶴傍我飛仙
人空中來謂我勿復歸格澤為君駕雲霓為君衣西
游崑崙墟可與世人違

雜感

鮑防

漢家海內承平久萬國戎王皆稽首天馬常銜苜蓿花
胡人歲獻蒲萄酒五月荔枝初破顏朝離象郡夕函關
鴈飛不到桂陽嶺馬走皆從林邑山甘泉御果垂仙閣
日暮無人香自落遠物皆重近皆輕雖有德不如鶴

雜言

司空圖

鳥飛飛兔蹶蹶朝來暮去驅時節
女媧祇解補青天不
解煎膠黏日月

雜詩

獨孤及

百花結成子春物捨我去
流年惜不得獨立空閨暮
心自有所待甘為物華悞
未必千黃金買得人一顧

雜諷九首

陸龜蒙

紅蠶緣枯桑青繭大如甕
人爭捩其臂羿矢亦不中
微

微待賢祿一一希入夢縱操上古言口噤難即貢蛟龍
在怒水拔取牙角弄丹穴如可游家家畜孤鳳凶門尚
兒戲戰血波瀾溶社鬼苟有靈誰能遏秋慟

童廩來觸犀德力不相及伊無愜心事祇有碎首泣
況將鵬蝨校數又百與十攻如餓鴟叫勢若脫兔急斯
為朽闕鍵怒掌扶以入年來橫干戈未見拔城邑得非
佐饗者齒齒待啜汁羈維豪傑輩四駭方少繫此皆
乘時利縱舍在呼吸吾欲斧其吭無雷動幽蟄

歌鵝慘于冰陸立懷所適斯人道仍悶不得不鳴呢當
時布衣士亦作天子客至今東方生滿口自誇白終為
萬乘交談笑無所隔致君非有書乃是堯舜畫祇令侯
門峻日掃貧賤迹朝趨九韶音莫列五鼎食如聞恭儉
語蹇蹇事夕惕可拍伊牧肩功名被金石

赤石可燒城讒邪易為伍詩人疾之甚取俾投豺虎長
風吹竅木始有音韻吐無木亦無風笙簧由喜怒女媧
鍊五石天缺猶可補當其利口銜罅漏不復數元精遺

萬類雙目如牖戶非是既相叅重瞳亦為瞽

東南有狂兇獵者西北矢利塵白冥冥獨此清夜止無
人語其事偶坐窺天紀安得東壁明洪洪用墳史搜揚
好古士一以聲雲水流堪灑菁英風足去稗秕如能出
奇計坐可平賊壘徐陳義皇道高駕太平軌攬疏成特
雄濯垢為具美貢賢當上賞景福視所履永播南薰音
垂之萬年耳

有蘖何青青空城雪霜裏千林盡枯槁苦節獨不死他

遭匠石顧攄入犧黃表遂得保天年私心未為恥高從
宿梟怪下亦容螻蟻大厦若掄材亭亭託君子

左右佩劔者彼此亦相笑趨時與閉門喧寂不同調潛
機取聲利自許臻乎妙志士以神窺慚然真可弔天之
發遐籟大小隨萬竅魁其鑪冶姿形質惟所召鼗笙磬
竽瑟是必登清廟伊聖不可欺誰能守蓬藿

橫笛喝秋風清商入疏越君居不夜城肯怨孤戍月吳
兵甚犀利太白光突兀日已費千金僅聞侵一撥豈無

惡年少縱酒游俠窟募為敢死軍去以梟叛卒豈無中
林士貫穿學問骨兵法五十家浩蕩如溟渤高懸鹿皮
睡清澗時依樾分已諾煙霞全遺事干謁既非格猛獸
未可輕華髮壯面師其謀幾能止征伐何妨秦堇勇又
有曹劉說堯舜尚詢舅公乎聽無忽

朝為壯士歌暮為壯士歌壯士心獨苦傍人謂之何古
鐵久不快倚天無處磨將來易水上猶足生寒波捷可
搏飛狄健能超橐駝羣兒被堅利索手安憑河驚飈掃

長林直木謝脩科，嚴霜凍大澤，僵龍不如蛇。昔者天
血碧，吾徒安嘆嗟。

感興

崔膺

富貴難義合，困窮易感恩。古來忠烈士，多出貧賤門。
世上樹桃李，但結繁華子。白屋抱關人，青雲壯心死。
本以勢利交，勢盡交情已。如何失情後，始歎門易軌。

遣興三首

杜甫

蟄龍三冬卧，老鶴萬里心。昔時賢俊人，未遇猶視今。嵇

康不得死孔明有知音又如壠底松用捨在所尋大哉
霜雪幹歲久為枯林

在昔龐德公未曾入州府襄陽耆舊間處士節獨苦豈
無濟時策終竟畏羅罟林茂鳥有歸水深魚知聚舉家
隱鹿門劉表焉得取

蓬生非無根漂蕩隨高風天寒落萬里不復歸本叢客
子念故宅三年門巷空悵望但烽火戎車滿關東生涯
能幾何常在羈旅中

寓言二首

賈至

凜凜秋閨夕綺羅知早寒
玉砧調鳴杵始搥機中紈
憶昨別離日桐花覆井欄
今來思君時白露盈堦溷
聞有關河信欲寄雙玉盤
玉以委貞心盤以薦嘉餐
嗟君在萬里使妾衣帶寬

春草紛碧色佳人曠無期
悠哉千里心欲採商山芝
歎惜良會晚如何桃李時
懷君晴川上佇立夏雲滋

寓興

賈島

莫居暗室中開目閉目同莫趨碧霄路容飛不容步暗
室未可居碧霄未可趨勸君跨仙竹日下雲為衢

寓興

歐陽詹

桃李有奇質樛櫟無妙姿皆承慶雲沃一種春風吹美
惡苟同歸喧囂徒爾為相將任玄造聊醉手中卮

不欺

賈島

上不欺星辰下不欺鬼神知心兩如此然後何所陳食
魚味在鮮食蓼味在辛掘井湏到流結交湏到頭此語

誠不謬敵君三萬秋

辯士

辯士多毀訾不聞談已非猛虎恣殺暴未常齧妻兒此
理天所惑所惑當問誰求食飼鷦鷯吐出美言詞善
哉君子人揚光掩瑕疵

新昌里

姚合

舊客常樂坊井泉濁而鹹新居新昌里井泉清而甘僮
僕慣苦飲食美翻憎嫌朝朝忍飢行戚戚如難堪中下

無正性所習便淫耽一染不可變甚於西與藍近貧曰
益廉近富日益貪以此當自警慎勿信邪讒

口號

賈島

中夜忽自起汲此百尺泉林木含白露星斗在青天

絕句

海底有明月圓於天上輪得之一寸光可買千里春

悲歌三首

并序

顧況

情思發動聖賢所不免也故師乙陳其宜延陵審其音

理亂之所經王化之所興信無逃聲豈徒文彩之麗遂
作歌以悲之

邊城路今日犁田昔人墓岸上沙昔時江水今人家今
人昔人共長歎四氣相催節迴換明月皎皎入華池白
雲離離度青漢我欲升天天隔霄我欲渡水水無橋
我欲上山山路險我欲汲井井泉遙越人翠被今何夕
獨立沙邊江草碧紫燕西飛欲寄書白雲何處逢來客
新繫青絲百尺繩心在君家轆轤上我心皎潔君不知

轆轤一轉一惆悵何處春風吹曉幕江南淶水通朱閣
美人二八顏如花泣向春風畏花落臨春風聽春鳥別
時多見時少愁人一夜不得眠瑤井玉繩相對曉

軒轅黃帝初得仙鼎湖一去三千年周流三十六洞天
洞中日月星辰聯騎龍駕景游八極軒轅弓劍無人
識東海青童寄消息

美人

陸龜蒙

美人抱瑤瑟哀怨彈別鶴雌雄南北飛一旦異栖託

諒非金石性安得宛如昨生為並蒂花亦有先後落秋
林對斜日光景自相薄猶欲悟君心朝朝佩蘭若

客思

楊敬之

木黍正離離南國翦白芝細腰沈趙女高髻唱蠻姬
路愧前岡月梳慚一領絲鄉心不可語獨念畏人知

感事

陸龜蒙

將軍被鯨函祗畏金矢鏃豈知讒箭利一中成赤族古
來信簧舌巧韻淒鏘曲君聞悅耳音盡日聽不足初因

起豪髮漸可離骨肉所以賢達心求人須任目

寓言

孟郊

誰言碧山曲不廢青松直誰言濁水泥不污明月色我
有青松心俗騁風霜力貞明既如此摧折安可得

汾陰行

李嶠

君不見昔日西京全盛時汾陰后土親祭祠齋宮宿寢
設厨供撞鐘鳴鼓樹羽旗漢家四葉才且雄賓筵萬靈
服九戎栢梁賦詩高宴罷詔書法駕幸河東河東太守

親掃除奉迎至尊導鑾輿五營將校列容衛三河縱觀
空里間回旌駐蹕降靈場焚香奠醑邀百祥金鼎發色
正焜煌靈祇煒燁攄景光埋玉陳牲禮神畢舉麾上馬
乘輿出彼汾之曲嘉可游木蘭為檝桂為舟櫂歌微吟
綵鷁浮簫鼓哀鳴白雲秋歡娛宴洽賜羣后家家復除
戶牛酒聲明動天樂無有千秋萬歲南山壽自從天子
向秦關玉輦金車不復還珠簾羽帳長寂寞鼎湖龍
髯安可攀千齡人事一朝空四海為家北路窮雄豪意

氣今何在壇場宮館盡蒿蓬路逢古老長歎息世事
回環不可測昔時青樓對歌舞今日黃埃聚荆棘山
川滿目淚沾衣富貴榮華能幾時不見只今汾水上
惟有年年秋雁飛

八月五日歌

顧況

四月八日明星出摩耶夫人降前佛八月五日佳氣新
昭成太后生聖人開元九年燕公說奉詔聽置千秋節
丹青廟裏貯姚宋花萼樓中宴岐薛清樂靈香幾處

聞鸞歌鳳吹動祥雲已於武庫見靈鳥仍向晉山逢老
君率土溥天無不樂河清海宴窮寥廓梨園弟子傳
法曲張果先生進仙藥玉座淒涼游帝京悲翁迴首感
承明雲韶九奏杳然遠惟有五陵松柏聲

三鄉驛伏覩玄宗望女凡山詩小臣斐然有感

劉禹錫

開元天子萬事足惟惜當時光景促三鄉陌上望仙山
歸作霓裳羽衣曲仙心從此在瑤池三清八景相追隨

天上忽乘白雲去世間空有秋風辭

江南遇天寶樂史

白居易

白頭老叟泣且言祿山未亂入梨園能彈琵琶和法曲
多在華清隨至尊是時天下太平久年年十月坐朝元
千官起居環佩合萬國會同車馬奔金鈿照耀石甕寺
蘭麝熏煮溫湯源貴妃宛轉侍君側體弱不勝珠翠繁
冬雪飄飄錦袍暖春風蕩漾霓裳翻歡娛未足燕寇至
弓勁馬肥戎語喧幽土人遷避獐鴛鼎湖龍去哭軒轅

從此漂淪到南土萬人死盡一身存
秋風江上浪無限
暮雨舟中酒一樽
涸魚久失風波勢
枯草曾霑雨露恩
我自秦來君莫問
驪山渭水如荒村
新豐樹老籠明月
長生殿暗鎖黃昏
紅葉紛紛蓋歌瓦
綠苔重重封壞垣
唯有中官作宮使
每年寒食一開門

連昌宮辭

元稹

連昌宮中滿宮竹
歲久無人森似束
又有墻頭千葉桃
風動落花紅簌簌
宮邊老人為余泣
小年選進因曾入

上皇正在望仙樓太真同憑欄干立樓上樓前盡珠翠
炫轉熒煌照天地歸來如夢復如癡何暇備言宮裡事
初過寒食一百六店舍無煙宮樹綠夜半月高弦索鳴
賀老琵琶定場屋力士傳呼覓念奴念奴潛伴諸郎宿
湏臾覓得又連催特勅街中許燃燭春嬌滿眼睡紅綃
掠削雲鬟旋粧束飛上九天歌一聲二十五郎吹管逐
逡巡大徧梁州徹色色龜茲轟錄續李暮言擫笛傍宮牆
偷得新翻數般曲

念奴天寶中名妓善歌樓下酺宴累
日之後萬衆喧隘嚴安之韋黃裳輩

辟易而不能禁衆樂為之罷奏玄宗常遣高力士大呼於樓上曰欲遣念奴唱歌邠王二十五郎吹小管逐看人能聽否未嘗不悄然奉詔其為當時所重也如此然而玄宗不欲奪俠游之盛未嘗置在宮禁或歲幸溫湯時巡東洛有司潛遣從行而已又玄宗幸上陽宮夜後新翻一曲屬明夕正月十五日潛游燈下忽聞酒樓上有笛奏前夕新翻之曲者大駭之明日密捕笛者詰驗之自云某某夕竊於天津橋上翫月聞宮中奏曲愛其新聲遂於天津橋柱以爪畫譜記之問其誰氏奏云臣即長安少年李暮也玄宗異之賜物遣去

平明

大駕發行宮萬人鼓舞途路中百官隊仗避岐薛楊氏諸姨車鬬風明年十月東都破御路猶存祿山過驅令供頓不敢藏萬姓無聲淚潛墮兩京定後六七年却

尋家舍行宮前莊園燒盡有枯井行宮門闌樹宛然爾
後相傳六皇帝不到離宮門久閉往來年少說長安玄
武樓成花萼廢去年勅使因斫竹偶值門開暫相逐荆
榛櫛比塞池塘狐兔驕癡緣樹木舞榭歌傾基尚存文
牕窈窕紗猶綠塵埋粉壁舊花鈿烏啄風箏碎珠玉上
皇偏愛臨砌花依然御榻臨堦斜蛇出燕巢盤鬪棋茵
生香案正當衙寢殿相連端正樓太真梳洗樓上頭晨
光未出簾影黑至今反掛珊瑚鉤指向傍人因慟哭却

出宮門淚相續自從此後還閉門夜夜狐狸上門屋我
聞此語心骨悲太平誰致亂者誰翁言野父何分別耳
聞眼見為君說姚崇宋璟作相公勸諫上皇言語切變
理陰陽未泰豐調和中外無兵戎長官清平太守好揀
選皆言由相公開元之末姚宋死朝廷漸漸由妃子祿
山宮裏養作兒號國門前鬧如市弄權宰相不記名
依稀憶得楊與李之廟謨顛倒四海搖五十年来作瘡
痂今皇神聖丞相明詔書纔下吳蜀平官軍又取淮西

賊此賊亦除天下寧年年耕種宮前道今年不遣子孫
耕老翁此意深望幸努力廟謨休用兵

感興

李涉

隋氏造宮闕峨峨倚雲煙搜奇竭四海立制謀千年秦
兵半夜來烈火焚高臺萬人聚筋血一旦為塵埃君看
沛河路尚說隋家柳但問哭陵人秋草沒來久

玉華宮

杜甫

谿迴松風長蒼鼠竄古瓦不知何王殿遺構絕壁下陰

房鬼火青壤道哀湍瀉萬籟真笙竽秋色正蕭灑美人
為黃土况乃粉黛假當時侍金輿故物獨石馬憂來藉
草坐浩歌淚盈把冉冉征途間誰是長年者

至開化里壽春公故宅

韋應物

寧知府中吏故宅一徘徊歷階存往敬瞻位泣餘哀廢
井沒荒草陰牖生綠苔門前車馬散非復昔時來

杜秋娘詩

并序

杜牧

杜秋金陵女也年十五為李錡妾後錡叛滅籍之入宮

有寵於景陵穆宗即位命秋為皇子傅姆皇子壯封漳
王鄭注用事誣丞相欲去已者指王為根王被罪廢削
秋因賜歸故鄉予過金陵感其窮且老為之賦詩

京江水清滑生女白如脂其間杜秋者不勞朱粉施老

淁即山鑄後庭千蛾眉秋持玉尊飲與唱金縷衣

勸君莫惜

金縷衣勸君須惜少年時花開堪折直須折莫待無花空折枝李錡長唱此辭

淁既白首叛秋

亦紅淚滋吳江落日渡潮岸綠楊垂聯裾見天子盼眄
獨依依椒壁懸錦幕鏡奩蟠蛟螭低鬟認新寵窈窕

復融怡月上白壁門桂影涼參差金堦露新重閒捻紫

簫吹

晉書盜開涼州張駿冢得紫玉簫

萼苔夾城路南苑鴈初飛紅粉

羽林仗獨賜辟邪旗歸來煮豹胎饜飫不能飴咸池昇
日慶銅雀分香悲雷音後車遠事往落花時燕謀得皇

子壯髮綠綵綵畫堂授傅姆天人親捧持虎睛珠絡襌

金盤犀鎮帷長楊射熊羆武帳弄啞咿漸拋竹馬戲稍


出舞雞奇嶄嶄整冠佩侍宴坐瑤池眉宇儼圖畫神

秀射朝輝一尺桐偶人江充知自欺王幽茅土削秋放

故鄉歸觚稜拂斗極回首尚遲遲四朝三十載似夢復
疑非潼關識舊吏髮已如絲却喚吳江渡舟人爭得
知歸來四隣改茂苑草菲菲青血灑不盡仰天知問誰
寒衣一匹素夜借鄰人機我昨金陵過聞之為歔歔自
古皆一貫變化安能推夏姬滅兩國逃作巫臣妻西子
下姑蘇一舸逐鴟夷織室魏豹俘作漢太平基誤置代
籍中兩朝尊母儀光武紹高祖本係生唐兒珊瑚破高
齊作婢春黃縢蕭后去揚州突厥為閼氏女子固不定

士林亦難期射鈎後呼父釣翁王者師無國要孟子有
人毀仲尼秦因逐客令柄歸丞相斯安知魏齊首見斷
箒中屍給喪蹶張輩廊廟冠峨危珥貂七葉貴何妨戎
虜支蘇武却生返鄧通終死飢主張既難測翻覆亦其
宜地盡有何物天高復何之指何為而捉足何為而馳
耳何為而聽目何為而窺已身不自曉此外何思惟因
傾一尊酒題作杜秋詩愁來獨長詠聊可以自怡

唐文粹卷十四下



總校官庶吉士臣張能照
校對官庶吉士臣翟槐
謄錄貢生臣王嘉稷

欽定四庫全書薈要

集部

唐文粹卷十五

上
下

詳校官脩選知縣臣吳回華



欽定四庫全書薈要卷一萬九千八百二十九

集部

唐文粹卷十五上

宋姚鉉編

詩庚

總五十九首

古調歌篇三

懷古十二

四皓詩

李白

潁陽東谿懷古

崔曙

登郭隗臺

皇甫松

歸沛縣道中晚泊留侯城

劉長卿

鴻門醺

王穀

古泉驛

張說

嚴子陵釣臺下作

權德輿

吳中懷古

劉駕

故絳行

杜頤

郢城懷古

李百藥

題西施浣沙石

胡幽真

鄴城懷古

孟雲卿

懷賢十

三君詠三首

高適

七愛詩六首

皮日休

陽城驛

元稹

集會七

奉同徐侍郎五雲溪新亭重陽宴集作

獨孤及

高軒過

李賀

郡中與諸文士醺集

韋應物

淮南秋夜呈周侶

李嶷

夜飲東亭

宋之問

讌客辭

張籍

過賈六

蘇晉

餞送三十

送渾將軍出塞

高適

送郭大夫再使吐蕃

張說

送張舍人之江東

李白

吳興送梁補闕歸朝賦得荻花

朱長文

送周愿判官歸嶺南

姚系

送韓愈從軍

孟郊

送王昌齡赴江寧

岑參

送李十一尉臨谿

常建

奉送韋起居老舅百日假滿歸嵩陽舊居

權

德輿

送從叔簡

孟郊

感別從叔簡再東歸

送弟郢東歸

盧十五竹亭送姪偁歸山

楊衡

送李觀韓愈別兼獻張徐州

孟郊

送狄宗亨

王昌齡

送孟浩然之廣陵

李白

送客

陳子昂

送唐次

武元衡

送皇甫湜赴舉

馬異

送張宗原

姚合

送綦毋潛落第還鄉

王維

送暨道士還玉清

李頎

淇上別趙仙舟

王維

送沈秀才下第東歸

賈島

崔九弟欲往南山

王維

同前

裴迪

留別王維

崔興宗

贈別沈四逸人

高適

送豆盧策歸別墅

孟郊

送柳淳入閩

四皓詩

李白

白髮四老人昂藏南山側
偃卧松雪間冥翳不可識
雲窻拂青靄石壁橫翠色
龍虎方戰爭於焉自休息
秦人

失金鏡漢祖昇紫極陰虹濁太陽前星遂淪匿一行佐
明聖歟起生羽翼功成身不居舒卷在胷臆窅冥合元
化茫昧信難測飛聲塞天衢萬古仰遺跡

潁陽東谿懷古

崔曙

靈谿氛霧歇皎鏡清心顏空色不映水秋聲多在山世
人久踈曠萬物皆自閒白鷺寒更浴孤雲晴未還昔時
讓王者此地閉玄關無以躡高步淒涼林壑間

登郭隗臺

皇甫松

燕相謀在茲積金黃巍巍上者欲何顏使我千載悲

歸沛縣道中晚泊留侯城

劉長卿

訪古此城下子房安在哉白雲去不返危堞空崔巍伊
昔楚漢時頗聞經濟才運籌風塵下能使天地開蔓草
日已積長松日已摧功名滿青史祠廟唯蒼苔百里暮
程遠孤舟川上迴進帆東風便轉岸前山來楚州澹相
引沙鷗閒不猜扣船從此去延首仍徘徊

鴻門醢

王穀

寰海沸兮爭戰苦風雲愁兮會龍虎四百年漢欲開基
項莊一劍何虛舞殊不知人心去暴秦天意歸真主項
王足底踏漢土席上相看渾未悟

古泉驛

於陵仲子宅也

張說

昔聞陵仲子守義辭三公身賃妻織屨樂亦在其中豈
無窮賤苦羞與傾巧同長白臨河上於陵入濟東我今
行至此感歎石泉空

嚴子陵釣臺下作

權德輿

絕頂聳蒼翠清湍石磷磷先生晦其中天子不得臣心
靈棲顙元纓冕猶緇塵不樂禁中卧却歸江上春潛驅
東漢風日使薄者醇焉用佐天下持此報故人則知大
賢心不獨私其身弛張有深致耕釣陶天真奈何清風
後擾擾論屈伸交情同市道利欲相紛綸我行訪遺臺
仰古懷逸民矰繳鴻鵠遠雪霜松桂新江流去不窮山
色凌秋旻人世自今古清輝照無垠

吳中懷古

劉駕

勾踐飲膽日吳王酒滿盃笙歌入海雲聲自姑蘇來西
施舞初罷侍兒整金篦衆女不敢妬自比泉下泥越鼓
聲騰騰吳王隔黃池難將甬東地更學會稽棲

故絳行

杜 顥

君不見銅鞮觀數里城池已蕪漫君不見虜祁宮幾重
臺榭亦微濛介馬兵車全盛時歌童舞女妖艷姿一代
繁華皆共絕九原唯望塚累累

郢城懷古

李百藥

客心悲莫序登墉瞰平陸林澤窅芊綿山川鬱重複王
公資設險名都距江隩方城疑北門溟海窮南服長策
挫吳豕雄圖競周鹿大蒐雲夢崦壯觀章華築人世更
不競西師日侵蹙運圯屬驅馳時屯恣敲扑莫救夷陵
火無復秦庭哭馱郢遂丘墟風塵俄慘黷狐兔時遊踐
霜露日霑沐釣渚故地平神臺層宇覆陣雲埋夏首窮
陰慘荒谷悵矣洲壑遷悲哉年紀倏雖異三春望終傷
千里目

題西施浣紗石

胡幽貞

一朝入紫宮萬古遺芳塵至今溪邊花不敢嬌青春

鄴城懷古

孟雲卿

朝發淇水南將尋北燕路魏家舊城闕寥落無人住伊
昔天地屯曹公獨中據羣臣將北面白日忽西暮三臺
竟寂寥萬世難長固雄豪安在哉衰草霑霜露崔巍長
河北尚見應劉墓古樹藏龍蛇荒茅伏狐兔永懷故池
館數子連章句逸興驅山河雄辭變雲霧我行覩遺跡

精爽如相遇斗酒將酌君悲風白楊樹

三君詠

并序

高適

開元中適游於魏郡北有故太師鄭公舊館里有故
尚書郭公遺業邑外又有故太守狄公生祠焉覩物增
懷遂為三君詠

魏鄭公

徵

鄭公經綸日隋氏風塵昏濟代取高位逢時敢直言道
光先帝業義激舊君恩寂寞卧龍處英靈千載魂

郭代公 元振

代公實英邁津涯浩難識權兵抗矯徵仗節歸有德縱
橫負大智顧盼安社稷流落勿重陳懷哉為悽惻

狄梁公 仁傑

梁公乃貞固勳烈垂竹帛言太后朝潛運儲皇策待
賢開相府共里登方伯至今青雲人猶是門下客

七愛詩 并序

皮日休

皮子之志常以真純自許每謂立大化者必有真相以

房杜為真相焉定大亂者必有真將以李太尉為真將
焉傲大君者必有真隱以盧徵君為真隱焉鎮澆俗者
必有真吏以元魯山為真吏焉負逸氣者必有真放以
李翰林為真放焉為名臣者必有真才以白太傅為真
才焉嗚呼吾之道時耶行其事也在乎愛忠矣不時耶
行其事也亦在乎愛忠矣苟有心歌詠者豈徒然哉

房杜二相國

吾愛房與杜貧賤共聯步脫身拋亂世策杖歸真主縱

橫握中筭左右天下務翫髀無敵才磊落不世遇美矣
名公卿魁然真宰輔黃閣三十年清風一萬古巨業照
國史大勲鎮王府遂使後世民至今受陶鑄粵吾少有
志敢躡前賢路苟得同其時願為執鞭豎

李太尉晟

吾愛李太尉崛起定中原驍雄十萬兵四面圍國門一
戰收三畿一叱散妖氛乘輿既反正克豎爭亡魂巍巍
柱天功蕩蕩蓋世勲仁於曹孟德勇過霍將軍丹券入

帑藏青史傳子孫所謂大丈夫動合驚乾坤所謂聖天子難得忠貞臣下以契魚水上以合風雲百世必一亂千年方一人吾雖翰墨子氣槩敢不羣願以太平頌題向甘泉春

盧徵君

鴻

吾愛盧徵君高卧嵩山裏百辟未一顧三徵方暫起坦腹對宰相岸幘揖天子建禮門前吟金鑾殿裏醉天下皆哺糟徵君獨絜已天下皆樂聞徵君獨洗耳天下皆

懷羞徵君獨多耻銀黃不妨懸赤紱不妨被而於心抱
中獨作羲皇地藍輦一云返泥詔褒不已再看緱山雲
重酌嵩陽水放曠書裏終逍遙醉中死吾謂伊與周不
若徵君貴吾謂巢與許不若徵君義高名無階級逸迹
絕涯涘萬世唐書中逸名不可比粵吾慕真隱彊以骨
肉累如教不為名敢有徵君志

元魯山

吾愛元紫芝清介如伯夷輦母遠之官宰邑無點疵三

年魯山民豐稔不暫飢三年魯山吏清慎各自持只飲
魯山泉只採魯山薇一室冰蘖苦四遠聲光飛退歸舊
隱來斗酒入茅茨鷄黍匪家畜琴樽常自怡盡日一菜
食窮年一布衣清似匣中鏡直如琴上絲世無用賢人
青山生白髭既卧默妻衾空立陳寔碑吾無魯山道空
有魯山辭所恨不相識援毫空涕垂

李翰林

吾愛李太白身是酒星魄口吐天上文跡作人間客礫

矻千丈林澄澈萬尋碧醉中草樂府十幅筆一息召見
承明廬天子親賜食醉曾吐御床傲幾觸天澤權臣妬
逸才心如斗筭窄失恩出內署海岳甘自適刺謁戴接
羅赴宴着穀屨諸侯百步迎明君九天憶竟遭腐脅疾
醉魄歸八極大鵬不可籠大椿不可摘蓬壺不可見姑
射不可識五岳為辭鋒四溟作胃臆惜哉千萬年此俊
不可得

白太傅

吾愛白樂天逸才生自然誰為詞翰器乃是經濟賢歟
從浮艷詩作得典誥篇立身百行足為文六藝全清望
逸內署直聲驚諫垣所刺必有思所臨必有傳忘形任
詩酒寄傲遍林泉所望握文柄所希持化權何期遇訾
毀中道多左遷天下皆汲汲樂天獨怡然天下皆悶悶
樂天獨捨旃高吟辭兩掖清嘯罷三川處世似孤鶴遺
榮同蛻蟬仕若不得志可為龜鏡焉

陽城驛

元稹

商有陽城驛名同陽道州陽公沒已久感我淚交流昔
公孝父母行與曾閔儔既孤善兄弟兄弟和且柔一夕
不相見若懷三歲憂遂誓不婚娶沒齒同衾綢繆夫死
他縣遺骨無人收公令季弟往公與仲弟留相別竟不
得三人同遠遊共負他鄉骨歸來藏故丘棲遲居夏邑
邑人無狗偷里中競長短來問劣與優官刑一朝耻公
短終身羞公亦不遺布人自不盜牛問公何德爾忠信
先自修發言當道理不顧黨與讎聲香漸翕習冠蓋若

雲浮少者從公學老者從公游往來相告報縣尹與君
侯名落公卿口湧如波薦舟天子得聞之書下再三求
書中願一見不異旱地虬何以持為御駟馬駕安輶公
方伯夷操事殷不事周我實唐士庶食唐之田疇我聞
天子意安敢專自由來為諫大夫朝夕侍冕旒希夷惇
薄俗密勿獻良籌神醫不言術人瘼曾暗瘳月請諫官
俸諸弟相對謀皆曰親戚外酒散目前愁公云不有爾
安得此嘉猷施餘盡酤酒客來相獻酬日旰不謀食春

深仍弊裘人心良感感我樂獨油油貞元歲云暮朝有
曲如鈎風波勢奔蹙日月光綢繆齒牙屬為猾禾黍暗
生螫豈無司言者肉食吞其喉豈無司搏者利柄扼其
鞬鼻復勢氣塞不可辨薰蕕公雖未顯諫惴惴如患瘤
飛章八九上皆若珠暗投炎炎日將熾積燎無人抽公
乃率其屬決諫同報仇延英殿門外扣閣仍叩頭且曰
事不止臣諫誓不休上知不可遏命以美語酬降官司
成署俾之為贅疣姦心不快活擊刺礪戈矛終為道州

去天道意悠悠遂令不言者反以言為訕喉舌坐成木
鷹鷂化為鳩避權如避虎冠豸如冠猴平生附我者詩
人稱好逌私來一執手恐若墜諸溝送我不出戶決我
不迴眸唯有太學生各具糧與糒咸言公去矣我亦去
荒陬公與諸生別步步駐行驕有生不可訣行行過閩
甌為師得如此得為賢者不道州間公來鼓舞歌且謳
昔公居夏邑狎人如狎鷗况自為刺史豈復援鼓桴滋
彰一時罷教化天下適炎瘴不得老英華忽已秋有鳥

哭楊震無兒悲鄧攸唯餘門弟子列樹松與楸今來過
此驛若弔汨羅洲祠曹諱羊祜此驛何不侔我願避公
諱名為避賢郵此名有深意蔽賢天所尤吾聞玄元教
日月冥九幽幽陰蔽翳者永為幽翳囚

奉同徐侍郎五雲谿新亭重陽宴集作

獨孤及

萬峯蒼翠色雙谿清淺流已符東山趣况值江南秋白
露天地肅黃花門館幽山公惜美景肯為芳罇留五馬

照池塘繁絃催獻酬風前孟嘉帽乘興李膺舟騁望傲
千古當歌遣四愁豈令永和人獨擅山陰遊

高軒過

李賀

華裾織翠青如葱金環壓轡搖玲瓏馬蹄隱耳聲隆隆
入門下馬氣如虹云是東京才子文章鉅公二十八宿
羅心胃元精昭昭貫當中殿前作賦聲摩空筆補造化
天無功龐眉書客感秋蓬誰知死草生華風我今垂翅
附冥鴻他日不羞蛇作龍

郡中與諸文士醺集

韋應物

兵衛森畫戟宴寢凝清香海上風雨至逍遙池閣涼
煩疴正消散嘉賓復滿堂自慙居處崇未覩斯民康
理會是非遣性達形迹忘鮮肥屬時禁蔬果幸見嘗
俯飲一盃酒仰聆金玉章神歡體自輕意欲凌風翔
吳中盛文史羣彥今汪洋方知大藩地豈曰財賦疆

淮南秋夜呈周倌

李嶷

天淨河漢高夜閒砧杵發清秋急如此離恨應難歇
風

亂池上螢露光竹間月與君共遊處忽作他鄉別

夜飲東亭

宋之問

春水鳴大壑皓月吐層岑岑壑景色佳慰我遠遊心
閣芳足幽氣驚棲多衆音高興南山曲長謠橫素琴

讌客詞

張籍

上客不用顧金羈主人有酒君莫違請君看取園中花
地上漸多枝上稀山頭樹綠不見石谿水無風應更碧
人人齊醉起舞時誰覺翻衣與倒幘明朝花盡人已去

此地獨來空遶樹

過賈六

蘇晉

主人病且閒客來情彌適一酌復一笑不知日將夕昨
來屬歡遊於今盡成昔努力持所趣空名定何益

送渾將軍出塞

高適

將軍族貴兵且強漢家已是渾邪王子孫相承在朝野
至今部曲燕支下控絃盡用陰山兒臨陣常騎大宛馬
銀鞍玉勒繡螭弧每逐嫖姚破骨都李廣由來先將士

衛青未肯學孫吳傳有沙場十萬騎昨日邊庭羽書至
城頭畫角三四聲匣裏寶刀晝夜鳴意氣能甘萬里去
辛勤動作一年行黃雲白草無前後朝望旌旗夕刁斗
塞下應多俠少年關西不見春楊柳從君但問所從誰
擊劍酣歌當此時遠別無輕繞朝策平戎早寄仲宣詩

送郭大夫再使吐蕃

張說

犬戎廢東獻漢使馳西極長策間酋渠猜阻自夷殛容
髮徂邊歲旌裘弊海色五年一見家妻子不相識武庫

兵猶動金方事未息遠圖俟才智苦節輸筋力脫刀贈
分手書帶加飡食知君萬里侯立功在異域

送張舍人之江東

李白

張翰江東去正值秋風時天晴一鴈遠海闊孤帆遲白
日行欲莫滄波杳難期吳洲如見月千里幸相思

吳興送梁補闕歸朝賦得荻花

朱長文

柳家汀洲孟冬月雲寒水清荻花發一枝特贈朝天人
願比蓬萊殿前雪

送周愿判官歸嶺南

姚系

早蟬望秋鳴夜琴怨離聲眇然多異感值子江山行由
來重義人感激事縱橫往復念遐阻淹留慕平生晨奔
九衢餞莫始萬里程山驛風月樹海門烟霞城易綃泉
源近拾翠沙溆明蘭蕙一為贈貧交空復情

送韓愈從軍

孟郊

志士感恩起變衣非變性親賓改舊觀僮僕生新敬坐
作羣書吟行為孤劒詠始知出處心不失平生正淒淒

天地秋凜凜軍馬令驛塵時一飛物色極四淨王師既不戰廟略盡無競王粲有所依元瑜初應命一章諭檄明百萬心氣定今朝旗鼓前笑別大夫盛

送王昌齡赴江寧

岑參

對酒寂不語悵然悲送君明時不得用白首徒攻文國澤從一官滄波幾千里群心滿天闕獨去過淮水舊家富春渚常憶卧江樓自聞君欲行頻夢南徐州窮巷獨閉門寒燈靜深屋北風吹微雪抱被肯同宿君今到京



口正值桃花時舟中饒孤興湖上多新詩潛虬且深蟠
黃鶴舉未晚惜君青雲氣努力加餐飯

送李十一尉臨谿

常建

泠泠花下琴君唱渡江吟天際一帆影預懸離別心以
言神仙尉因致瑤華音迴軫撫商調越谿澄碧林

奉送韋起居老舅百日假滿歸嵩陽舊居

權德輿

威鳳翔紫氛孤雲出寥天奇彩與幽姿縹緲皆自然嘗

聞陶唐氏亦有巢許全以茲聳風俗豈必効羈牽大君
遂群方左史蹈前賢振衣去朝市賜告歸林泉滑和固
難久循性得所便有名皆畏途無事乃真筌舊壑窮杳
窈新潭漾淪漣巖花落又開山月缺復圓輕策逗蘿逕
幅巾凌翠烟機閒魚鳥狎體和芝朮鮮四皓本避難二
疎猶待年況今寰海清復此鬢髮玄顧慙纓上塵未絕
區中緣齊竽終自退心寄嵩峯巔

送從叔簡

孟郊

長安離別道宛在東城隅
寒草根未死愁人心已枯
促水上影遙遙天際途
生隨昏曉中皆被日月驅
北驥繞山岳南帆指江湖
高蹤一起忽千里在須臾

感別從叔簡再東歸

去年車馬道高槐
結浮陰下有名利人
一人千萬心黃鶴共遠語
滄溟無近潯苦苦靜退姿
泠泠思歸吟菱唱忽生聽
芸書迴望深清風散言笑
餘花綴衣襟獨恨魚鳥別
一飛將一沉

送弟郢東歸

爾去東南夜我無西北夢誰言貧別易貧別愁更重曉
色奪明月征人逐辟動春風楚濤高旅榜將誰共

盧十五竹亭送姪偁歸山

楊衡

葉落寒擁壁清霜夜霑石正是憶山時復送歸山客殷
勤一樽酒曉月當牕白

送李觀韓愈別兼獻張徐州

孟郊

富別愁在顏貧別愁銷骨懶磨舊銅鏡畏見新白髮古

樹春無花子規啼有血離絃不堪聽一聽三四絕世途
非一險俗慮各千結有客步大方驅車獨迷轍故人韓
與李逸翰雙皎潔哀哉摧折歸贈詞縱橫設徐方國號
在元戎天下傑補生投刺遊王粲吟詩謁高情無遺照
朗抱開曉月有土不埋冤有讎皆為雪願為直草木永
向君地列願為古琴瑟永向君地發欲識丈夫心曾將
孤劍說

送狄宗亨

王昌齡

秋在水清山暮蟬
洛陽樹色鳴皋烟
送君歸去愁不盡
又惜空度涼風天

送孟浩然之廣陵

李白

故人西辭黃鶴樓
烟花三月下揚州
孤帆遠影碧山盡
唯見長江天際流

送客

陳子昂

故人洞庭去
楊柳春風生
相送河洲晚
蒼茫別思盈
白蘋已堪把
綠芷復含榮
江南多桂樹
歸客贈生平

送唐次

武元衡

都門去馬嘶灞水東流淺青槐驛路長白日離亭晚望
望烟景微草色行人遠

送皇甫湜赴舉

馬異

馬蹄聲特特去入天子國借問去是誰秀才皇甫湜含
吐一腹文八音兼五色主文有崔李郁郁為朝德青銅
鏡必明朱絲繩必直稱意太平年願子長相憶

送張宗原

姚合

東門送客道春色如死灰一客失意行十客顏色低住
者既無家去者又非歸愁窮一成疾百藥不可治子賢
我且愚命分不合齊誰開蹇躓門日日同遊栖子行何
所之切切食與衣誰能買仁義令子無寒飢野田不生
草四向生路歧士人甚商賈終日須東西鴻鴈春北去
秋風復南飛勉君向前路無失相見期

送綦母潛落第還鄉

王維

聖代無隱者英靈盡來歸遂令東山客不作顧采薇既

至君門遠孰云吾道非江淮度寒食京兆縫春衣置酒
長亭送同心與我違行當浮桂棹未幾拂荆扉遠樹帶
行客孤村當落暉吾謀適不用勿謂知音稀

送暨道士還玉清

李頎

仙官有名籍度世吳江濱大道本無我青春長與君中
州俄已到至理得而聞明主降黃屋時人看白雲空山
何窈窕三秀日氤氲此留書客超遙烟駕分

淇上別趙仙舟

王維

相逢方一笑相送還成泣祖席已傷離
荒城復愁入天寒遠山靜日暮長江急
解纜君已遙望君空佇立

送沈秀才下第東歸

賈島

曲言惡者誰悅耳如彈絲直言好者誰刺耳如長錐
沈生才俊秀心腸無邪欺君子忌苟合擇交如求師
毀出嫉夫口騰入禮部闈下第若子耻遺才人耻之
東歸家堂遠掉轡時參差浙雲近吳見汴柳接楚垂
明年春光別回首不復疑

崔九弟欲往南山

王維

城隅一分手，幾日還相見。
山中有桂花，莫待花如霰。

和

裴迪

歸山深淺去，須盡丘壑美。
莫學武陵人，暫遊桃源裏。

留別王維

崔興宗

駐馬欲去襟，清寒御溝上。
前山景氣佳，獨往還惆悵。

贈別沈四逸人

高適

沈侯未可測，其況信浮沉。
十載常獨坐，幾人知此心。
乘

舟蹈滄海買劍投黃金世務不足煩有田西山岑我行
遇知己遂得開清襟何意閩閩間沛然江海深風掃
秋樹濮上多鳴砧耿耿罇酒前聯鴈飛愁陰平生重離
別感激對孤吟

送豆盧策歸別墅

孟郊

短松鶴未巢高石雲始棲君今蕭灑去性與雲鶴齊力
買奇險地手開清淺溪身披薜蘿襟山陟莓苔梯一卷
冰雪文避俗常自攜

送柳淳入關

青山輾為塵白日無閒人自古推高車爭利西入秦王門與侯門待富不待貧空齋一束書獨去誰相親

唐文粹卷十五上